
INFORMACIJA O VOĐENJU PREGOVORA ZA ZAKLJUČIVANJE OPŠTEG KOLEKTIVNOG UGOVORA O IZMJENAMA I DOPUNAMA OPŠTEG KOLEKTIVNOG UGOVORA ZA TERITORIJU FBiH

Na osnovu **Odluke Izvršnog odbora** o pokretanju inicijative za izmjene i dopune Opšteg kolektivnog Ugovora za teritoriju FBiH broj **I-295/17 od 05.09.2017.** godine, koja je potvrđena od strane UO, Odluke o imenovanju pregovaračkog tima za vođenje pregovora i zaključivanje OKU broj **I-296/17** i člana **23. Općeg kolektivnog ugovora za teritoriju FBiH**, Pregovarački tim UPFBiH je pokrenuo Inicijativu za izmjene i dopune Općeg kolektivnog Ugovora za teritoriju FBiH.

Dana 13.11. 2017. godine, pregovarački tim UPFBiH je Savezu samostalnih sindikata u skladu sa članom 139. stav 2., člana 144. Zakona o radu ("Službene novine FBiH" broj 26/16) i članova 19., 21. i 23. Općeg kolektivnog Ugovora za teritoriju FBiH ("Službene novine FBiH" broj 48/16 i 62/16), uputio Inicijativu sa prijedlogom Izmjena i dopuna OKU.

Prijedlog izmjena i dopuna se odnosio na sljedeće: da se u članu 7. OKU-a ukine najniža satnica; da se u članu 11. OKU-a uvećanje plaće po osnovu prekovremenog rada, noćnog rada, rada na dane sedmičnog odmora i rada za dane praznika reguliše granskim kolektivnim ugovorom, pojedinačnim kolektivnim ugovorom ili Pravilnikom o radu; da se u članu 12. minuli staž određuje na isti način; da se u članu 13. i 14. doda odredba da se topli obrok, naknada za prijevoz s posla i na posao i regres isplaćuju u visini neoporezivog dijela; brisanje člana 26. te izmjene člana 27, 29. i 30.

Savez samostalnih sindikata BiH je 27.11.2017. godine odgovorio na inicijativu i **prihvatio prijedlog za izmjene i dopune OKU za teritoriju FBiH.** Uz odgovor SSSBiH je dostavio svoj Prijedlog za izmjene OKU prema kojem su predložili povećanje najniže satnice sa 2.31 KM na 3,54 KM, brisanje člana 8. kojim se utvrđuje niža od najniže satnice te izmjene u članu 9.

Prvi sastanak pregovaračkih timova održan je **20.12.2017. godine** na kojem je potpisan Protokol za **vođenje pregovora za zaključivanje Opšteg kolektivnog ugovora o izmjenama i dopunama Opšteg kolektivnog Ugovora za teritoriju FBiH.**

Drugi sastanak pregovaračkih timova shodno Protokolu je **održan je 17.01.2018. godine.** Na pomenutom sastanku pregovarački timovi su razmatrali oba prijedloga Izmjena i dopuna OKU i uspjeli se usaglasiti samo vezano za član 8.

Treći sastanak pregovaračkih timova SSSBiH i UPFBiH je u skladu sa potpisanim Protokolom **održan 08.02.2018. godine.** Nakon dugotrajnih pregovora pregovarački timovi nisu postigli dogovor o izmjenama i dopunama OKU. Obzirom da nisu uspjeli postići dogovor niti za jedan član izmjena i dopuna OKU pregovarački timovi su zaključili da nema potrebe da se ponovno sastaju jer su stavovi strana u pregovorima u potpunosti u suprotnosti.

Prema članu 26. Općeg kolektivnog Ugovora za teritoriju FBiH svaka strana potpisnica ima pravo da raskine kolektivni ugovor, ukoliko druga strana:

- ne prihvati, u roku od 15 dana, prijedlog za pregovore o izmjenama i dopunama kolektivnog ugovora;

- ne odgovori u roku od 15 dana na pisani zahtjev druge strane za otpočinjanje pregovora;

- kad prihvati pregovore, ako se u roku od tri (3) mjeseca, ne postigne dogovor o izmjenama i dopunama kolektivnog ugovora.

Imajući u vidu da je SSBIH 27.11.2017. godine prihvatio Inicijativu za otpočinjanje pregovora za zaključivanje OKU za teritoriju FBiH, shodno članu 26. Stav 1. alineja 3. OKU i člana IV Protokola za vođenju pregovora za zaključivanje OKU o izmjenama i dopunama OKU za teritoriju FBiH, pregovori su se trebali okončati najkasnije do 27. 02.2018. godine.

Obzirom da u roku od 3. mjeseca pregovarački timovi nisu postigli dogovor o izmjenama i dopunama OKU za teritoriju FBiH, prema članu 26. stav 1. svaka strana potpisnica ima pravo da raskine OKU za teritoriju FBiH.

Shodno navedenom predlaže se Upravnom odboru da na osnovu člana 141. stav 2. Zakona o radu i člana 26. stav 1. alineja 3. Općeg kolektivnog Ugovora za teritoriju FBiH ("Službene novine FBiH" broj 48/16 i 62/16) donese Odluku o raskidu navedenog Općeg kolektivnog ugovora.

Prijedlog za donošenje Odluke o raskidu je iz razloga da bi se izbjegli sudski sporovi i različito tumačenje važenja OKU za teritoriju FBiH.